

虛說更佳，連下句蓋謂盧為奸佞所畏、為君主所親，如鳴鳳之朝陽，實治世之良臣。二段十六句，前四句叙潞州之功，後十二句叙鎮太原邊鄙之功，已見注。詳太原而略潞州，因題立意。三段謂其保佐扶持之功在於沖默杳冥，不為暗室欺心之事，故華髮而見稱於朝廷。先總寫其功德品行，然後方叙其留守太原時吟詩賞菊、耽於仙道，既暗寓其不得志於時，亦贊其閒雅風流。四段十二句傷己不遇。末四句則祝其重入朝為相。

盧鈞與義山有姻婭之親（義山之弟義叟娶盧鈞之女），係會昌年間名臣，大中朝雖不得志，且與令狐有隙，為令狐所排抑，然義山於窮途末路之際，能寄詩望其援引者，舍盧鈞外已別無他人。末四句雖祝頌套語，亦望其重入朝廷時能予以汲引也。盧鈞大中六年七月至九年七月在河東節度使任。據詩中所叙情景，似非初出鎮時。酌編大中七年。

夜雨寄北（一）

君問歸期未有期，巴山夜雨漲秋池①。何當共剪西窗燭，却話巴山夜雨時？

校記

（一）【馮曰】萬首絕句作「夜雨寄內」。

【按】文學古籍刊行社影印明嘉靖刊本唐人萬首絕句作「夜雨寄北」。馮氏

所見當是別本。姜本作「夜雨寄內」。除姜本外，義山詩集諸本均作「夜雨寄北」。

集注

①【姚注】一統志：「四川保寧府有大巴嶺，與小巴嶺相接，世傳九十里巴山是也。」【馮注】三巴皆可云巴山，而此則當以前後詩會其意也。【程注】嚴武詩：「卧向巴山月落時。」【楊柳曰】按巴山有二，一為川北之大巴山脈，世稱巴山；另一則為湖北巴東縣南之巴山，……詩中之巴山乃指後者（決非川北之巴山）。【按】唐人詩中巴山多泛指今四川境內之山。如杜甫傷春之二：「巴山春色靜，北望轉遙迤。」程注引嚴武詩「卧向巴山月落時」亦同。未必具體指大巴山或巴東縣南之巴山。義山文中之「巴山」亦每泛指東川之山（參初起箋引為崔福寄彭城公啟）。又，商隱唐梓州慧義精舍南禪院四證堂碑銘：「掩靄巴山，繁華蜀國。」巴山亦明指東川一帶之山。另，劉滄宿蒼溪館：「巴山夜雨別離夢，秦塞舊山迢遞心。」似用商隱詩語，蒼溪在閬州，亦與東川鄰接，巴山所指亦同。

箋評

【范晞文曰】唐人絕句，有意相襲者，有句相襲者。……賈島渡桑乾云：「客舍并州已十霜，歸心日夜憶咸陽。無端更

渡桑乾水，却望并州是故鄉。」李商隱夜雨寄人云……此皆襲其句而意別者。若定優劣、品高下，則亦昭然矣。（對

牀夜語）

【陳模曰】夜雨（寄北）（略）、贈畏之（待得郎來。略）、為有（略）。此皆句意透徹，有姿態而好者也。（懷古錄）

【李夢陽曰】唐詩如貴介公子，風流閒雅，觀此信然。（唐詩選脈箋釋會通評林引）

【唐汝詢曰】題曰「寄北」，此必私暱之人。就景生意，為後人話舊長談。（同上引）

【周筼曰】以今夜雨中愁思，冀為他日相逢話頭，意調俱新。第三句應轉首句，次句生下落句，有情思。蓋歸未有期，復為夜雨所苦，則此夕之寂寞，惟自知之耳。得與共話此苦於剪燭之下，始一腔幽衷，或可相慰也。「何當」、「却話」四字妙，犁犁雲樹之思可想。（同上）

【蔣一葵曰】末句又翻出一層來。（同上引）

【郭濬曰】兩疊「巴山夜雨」，無聊之甚。（同上引）

【朱彝尊曰】（君問歸期）問。（未有期）答。（次句）今夜。（三句）他日。（四句）今夜。時在東川幕下。

【沈德潛曰】此寄閨中之詩。雲間唐氏謂寄私暱之人，詩中有何私暱意耶？

【何曰】水精如意玉連環，荆公屢仿此。（輯評。按陳永正云：「王安石的封舒國公：「桐鄉山遠復川長，紫翠連城碧滿隍。今日桐鄉誰愛我，當時我自愛桐鄉。」即仿此。）

【吳昌祺曰】東坡「對牀風雨」之詩，意亦本此。題曰「寄」，則非今宵相會，當是答其書信耳。（刪訂唐詩解）

【范大士曰】圓轉如銅丸走坂，駿馬注坡。（歷代詩發）

【徐德泓曰】翻從他日而話今宵，則此際羈情不寫而自深矣。此種見地，高出諸家。

【姚曰】「料得閨中夜深坐，多應說着遠行人」，是魂飛到家裏去，此詩則又預飛到歸家後也。奇絕。

【屈曰】即景見情，清空微妙，玉溪集中第一流也。

【程曰】此隨柳仲郢時作，自感於其久留南中也。

【馮曰】語淺情濃，是寄內也。然集中寄內詩皆不明標題，當仍作「寄北」。

又曰：此時義山於巴蜀間兼有水陸之程，

玩諸詩自見，但無可細分確指。

【桂馥曰】眼前景反作日後想，此意更深。（札樸）

【紀曰】探過一步作結，不言當下云何而當下意境可想。

完，故為高唱。（詩說）

作不盡語每不免有做作態，此詩含蓄不露，却只似一氣說

【王堯衢曰】以目下之落寞，作他時之佳話。逆計其必有是境，而又不知何日始有是境也，故曰「何當」。篇末評：此詩

內複用「巴山夜雨」，一實一虛。（古唐詩合解）

【馬位曰】全不似玉谿手筆。（秋窗隨筆）

【姜炳璋曰】只一轉換間，慧舌慧心。

【李慈銘曰】（三四句）淡寂中有無限意理。（越縕堂讀書簡端記）

【施補華曰】李義山「君問歸期」一首，賈長江「客舍并州」一首，曲折清轉，風格相似，取其用意沈至，神韻尚欠一層也。

（峴傭說詩）

【林昌彝曰】七絕喜深而不宜淺，喜婉曲而不宜平直。……李義山夜雨寄北……，眼前景却作後日懷想，此意更深。

（射鷹樓詩話） 又曰：詩從對面寫法，如唐人巴山夜雨、蘆荻花中皆有加倍一層境界。（海天琴思錄）

【俞陛雲曰】清空如話，一氣循環，絕句中最為擅勝。詩本寄友，如聞娓娓清談，深情瀟見。此與「客舍并州已十霜」詩，皆首尾相應，同一機軸。（詩境淺說續編）

【張曰】此亦留滯巴閬時作。時初交秋，而義山亦將歸矣。（會箋）又曰：蜀遊是夏秋之交，玩楚澤等詩可見。此「秋池」「夜雨」，亦係初秋景況。蓋寄此詩後，義山亦即作歸計矣。末二句預定歸計，與首句相喚。（辨正）

【郝世峰曰】在一句中寫了巴山、夜、雨、秋、池等六種物象，而用一個動詞「漲」聯絡、貫通於其間，為它們灌注靈魂，構成一幅生動的圖畫；這幅圖畫充溢着迷濛的愁悶氣氛，於表現環境特徵的同時，映現着詩人淹沒於愁情的心境。……這裏的「巴山夜雨漲秋池」，使愁懷借景物而顯現，即可視為感情的外在形態。……詩人因不耐今夜的寂寞而向往異日的快慰，而這向往中的莫大快慰就是回味今夕的寂寞。這一曲折入微的向往，感情是複雜微妙的，它雖然浸潤着追求的興奮與滿足，却也融匯着對現實空虛落寞的感受，在給人以快慰的形式中，使人更深刻地感受詩人的今夕苦況，即「巴山夜雨漲秋池」的寂寞。（李商隱夜雨寄北賞析）

【按】馮、張均繫大中二年巴蜀之游。岑仲勉玉谿生年譜會箋平質已力辨所謂巴蜀之游並不存在，此處僅就本篇辨之。馮、張均以萬首絕句題作「夜雨寄內」為據，然現存義山詩集舊本除姜本作「寄內」外，均作「寄北」，明嘉靖刊本萬首絕句亦作「北」不作「內」，故馮氏亦感孤證之不足憑而未敢遽改。按馮譜，義山係先自桂返洛，然後又出遊江漢巴蜀，於深秋略頓巴巫之境。此說之謬顯然。陸發荆南始至商洛，歸墅已言「青辭木奴橘」「四海秋風闊」「鄧橘未全黃」，則至鄧州、商洛時

已屆深秋，返洛後再出行至江漢巴蜀，往返數千里，而云「深秋略頓巴巫之境」，則時間直若停滯不動矣。張箋謂桂管歸途先至巴蜀，尋杜棕，不果而中途折回，由荆南赴洛，而後歸京。並謂夜雨寄北所寫係初秋景況，由洛赴京則在九月初。是則客居巴蜀之時至返洛又復入京之時，前後相距亦不過兩月左右，如此長途往返，時日豈敷分配？況詩明言「君問歸期未有期」，則作詩時歸期尚在不可知之數，又何從測其「即作歸計」乎？「何當」云云，正見歸期無日。且如張氏所云，義山之游巴蜀，幾全部時日皆於僕僕道中度過，並無一地有較長時日滯留之痕迹（實亦無此可能）。試問於如此變動不居之旅途中，雙方書信往來竟若今日藉現代化通訊工具傳遞之迅便，一似預知其何日當在何地者，豈非純屬想當然？

楊柳先生為補救馮、張之明顯缺失，於如何確解李商隱詩一文中提出新說，略云：「大中二年，義山北返途次淹留荆巴，其入蜀地區未超越長江沿岸夔、峽一帶，時間為夏秋之交，不出兩月。除夜雨寄北外，尚有風、搖落、因書、過楚宮等詩，均為此際產物。……按商隱淹留荆巴，恰值孟秋苦雨季節，長江流域漲水，與詩中情景正合。」此說固遠勝馮、張巴蜀之游臆說，然「巴山」唐人詩中多為泛指，謂指巴東縣南之巴山，似乏書證。且此詩情味，顯係長期留滯，歸期無日之況，與客途稍作羈留者有別。似不得因是年秋桂管歸途有夔峽之短期滯留，遂謂此詩亦作於夔峽也。當是梓幕思歸寄酬京華友人之作，確年不可考，當為在梓幕滯羈已數年之久，尚未歸京探望兒女時（商隱於大中七年冬至八年春，曾有歸京之行，詳後贈庾十二朱版、留贈畏之七律、行至金牛驛寄與元渤海）

尚書等詩按語)。約大中七年秋。

考證此詩作年，關鍵有以下三點。一為詩題作「夜雨寄北」抑或作「夜雨寄內」。關於此點，校記中已列舉現存義山詩集諸舊本（除姜本外）均作「夜雨寄北」，連馮氏侍以為證之萬首絕句現存最早刊本亦作「夜雨寄北」，證明「寄內」之異文不足憑。二為詩中「巴山」所指。注①中已列舉商隱在東川幕所撰之唐梓州慧義精舍南禪院四證堂碑銘「掩靄巴山，繁華蜀國」及為崔從事福寄尚書彭城公啟「潼水千波，巴山萬嶂」之文，證明「巴山」泛指東川一帶之山，且為其梓幕詩文之習用語。三為詩中所抒寫之羈愁究竟是長期留滯、歸期無日之情緒，抑是在變動不定之旅途中產生之愁緒。關於此點，詩之首句「君問歸期未有期」實已明顯透露出係長期留滯、歸期未有期之濃重羈愁。此點若聯繫其梓幕期間一系列詩句（如「萬里憶歸元亮井，三年從事亞夫營」、「江海三年客」、「三年苦霧巴江水」、「三年已制思鄉淚，更入新年恐不禁」、「豈關無景物，自是有鄉愁」、「定定住天涯」），便可看出此種羈愁鄉思乃是商隱留滯梓幕數年後最強烈濃重之情緒。綜上數端，此詩作於羈滯梓幕期間應屬無疑。

此詩佳處，在詩心詩情，而非緣刻意構思。首句包含一問一答，仿佛深夜燈前，向遠方友人遙吐歸期無日之心曲，為以下各句伏根。次句推開，寫想像中室外情景。巴山、夜、雨、秋、池等一系列包含寂寥、淒清、綿長、蕭瑟意味之物象，以一「漲」字綰結，構成極富包蘊之氛圍，寫實中寓含象徵，羈滯異鄉之愁思似隨單調之雨聲逐漸漲滿秋池。三句轉出新境，遙想他日重逢，今宵巴山夜雨之

情景均成西窗剪燭夜話之談資。在重逢之歡愉中回首淒清之往事，不但使重逢更顯珍貴而富詩意，且此遙想本身亦使眼前淒清之雨夜增添一絲溫煦，給寂寞之心靈帶來幾許慰藉。「西窗剪燭」之典型細節加強重逢時之親切溫暖氣氛，亦透出今宵遙想時悠然神往之情。從中可見義山不僅善於將生活中淒清之情事化為淒傷之詩美，且有一種化解淒傷心境、化淒傷為溫煦之心靈潛能。此正義山詩心詩情之特質，亦其詩雖感傷而不絕望頹廢之原因。

詩語淺情深，曲折含蘊而清新流暢，回環往復中有發展變化，極富風調情致之美、自然本色之美。

李夫人三首^①

一帶不結心^②，兩股方安髻^③。慚愧白茅人^④，月沒教星替^⑤。

其二

剩結茱萸枝^⑥，多擘秋蓮的^⑦。獨自有波光^⑧，綵囊盛不得^⑨。

其三

蠻絲繫條脫^⑩，妍眼和香屑^⑪。壽宮不惜鑄南人^⑫，柔腸早被秋眸割^⑬。清澄有餘幽素香，鰥魚渴鳳凰真珠房^⑭。不知瘦骨類冰井^⑮，更許夜簾通曉霜。土花漠碧雲茫茫^⑯，黃河欲盡天蒼蒼^⑰。